

Soalan No: 34

PEMBERITAHU PERTANYAAN DEWAN RAKYAT

PERTANYAAN : LISAN

DARIPADA : DATO' MANSOR BIN OTHMAN [NIBONG TEBAL]

TARIKH : 2.8.2017

SOALAN :

Dato' Mansor Bin Othman [Nibong Tebal] minta **MENTERI PENDIDIKAN** menyatakan perincian kes-kes buli di kalangan pelajar-pelajar sekolah semenjak tahun 2010 sehingga kini dan jelaskan perancangan Kementerian bagi tangani gejala buli di kalangan pelajar-pelajar sekolah.

JAWAPAN

Tuan Yang di-Pertua,

Peratusan murid terlibat dalam salah laku buli yang direkodkan dalam Sistem Sahsiah Diri Murid adalah terkawal dengan trend yang menurun. Sebanyak 0.08 peratus murid yang melakukan salah laku buli pada tahun 2012 dan 2013, 0.06 peratus murid pada tahun 2014 dan 2015, dan 0.07 peratus pada tahun 2016. Dalam tempoh Januari hingga Jun 2017, sebanyak 0.02 peratus murid terlibat dalam gejala tersebut.

Kementerian Pendidikan Malaysia (KPM) sentiasa memandang serius dan mengambil beberapa langkah proaktif dalam membendung gejala buli melibatkan murid di sekolah. Antaranya melalui usaha pencegahan dengan

pelaksanaan arahan beberapa surat pekeliling seperti Surat Siaran Menangani Tingkah laku ala samseng dalam Kalangan Murid bertarikh 11 Mac 2009, Surat Pekeliling Iktisas Bilangan 8 tahun 2010 Garis Panduan Mencegah dan menangani Perbuatan Buli dalam kalangan Murid di sekolah, Surat Siaran Pematuhan Garis Panduan Mencegah dan Menangani Perbuatan Buli dalam kalangan murid di sekolah bertarikh 11 November 2014 dan Surat Pekeliling Iktisas Bil 7/2011; Pelaksanaan Standard Operating Procedure 1:3:7 Pelaporan Dan Tindakan Menangani Isu Disiplin Murid tahun 2011. Usaha pemulihan dan bimbingan kepada mangsa buli juga dilaksanakan melalui guru bimbingan dan kaunseling sekolah dengan kerjasama ibu bapa dan AADK. Bagi memantapkan langkah pencegahan dan penguatkuasaan disiplin murid termasuk gejala buli, KPM telah menjalinkan kerjasama dengan agensi luar seperti PDRM dan ATM, di antaranya melalui Program Remaja Berwawasan.